

Resolución de concesión directa de axudas sociais de carácter extraordinario destinadas a complementar o bono social térmico, no exercicio 2021

ANTECEDENTES

Primeiro. O Real decreto lei 15/2018, do 5 de outubro, de medidas urxentes para a transición enerxética e a protección dos consumidores, creou un programa de concesión directa de axudas destinadas a paliar a pobreza enerxética en consumidores vulnerables, no que respecta á enerxía destinada a calefacción, auga quente sanitaria ou cociña, denominado bono social térmico.

A axuda a conceder ten como finalidade compensar gastos necesarios para garantir o subministro de enerxía para usos térmicos ou o apoio a actuación de aforro ou melloras da eficiencia enerxética aos consumidores vulnerables.

Esta axuda é compatible coa percepción doutras subvencións, axudas, ingresos ou recursos, para a mesma finalidade procedentes de calquera Administración ou entes públicos e privados, así como coa percepción do bono social de electricidade.

En cada exercicio serán persoas beneficiarias aqueles/as consumidores/as que sexan persoas beneficiarias do bono social de electricidade a 31 de decembro do ano anterior.

Segundo. Dada a situación de precariedade económica creada polo constante incremento do prezo da electricidade, e da enerxía en xeral, que se traduce nunha maior pobreza enerxética, e a insuficiente contía do bono social térmico para facer fronte aos gastos ocasionados polos servizos de enerxía mínimos para satisfacer as necesidades básicas, considerase necesario, por razóns de interese, público, social, económico e humanitario, implementar unha axuda extraordinaria que complemente as recibidas en concepto do bono social térmico correspondente ao ano 2021 por parte das persoas beneficiarias da Comunidade Autónoma.

CONSIDERACIÓNS LEGAIS E TÉCNICAS

Primeiro. De conformidade co Decreto 216/2020, do 3 de decembro, polo que se establece a estrutura orgánica da Consellería de Política Social, correspóndelle a este órgano superior da Administración xeral da Comunidade Autónoma de Galicia propoñer e executar as directrices xerais do Goberno no ámbito do benestar, que engloban as competencias en materia de servizos sociais, incluíndo entre outras as políticas de benestar social, inclusión social, servizos comunitarios, inmigración, na forma establecida no dito decreto e a través do seu órgano de dirección a Dirección Xeral de Inclusión Social.





No exercicio de ditas competencias a Consellería asumirá a concesión e pagamento dunhas axudas sociais extraordinarias outorgadas para complementar o bono social térmico, regulado no Real decreto lei 15/2018, do 5 de outubro, de medidas urxentes para a transición enerxética e a protección dos consumidores.

Segundo. A concesión destas axudas complementarias do bono social térmico realizarase de forma directa de conformidade co establecido no artigo 22.2 c) da Lei 38/2003, do 17 de novembro, xeral de subvencións, os artigos 19.4 c) e 26 da Lei 9/2007, do 13 de xuño, de subvencións de Galicia, e o artigo 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, ao acreditarse razóns de interese público, social, económico e humanitario que dificultan a súa convocatoria pública.

Vista a Lei 38/2003, do 17 de novembro, a Lei 9/2007, do 13 de xuño e o Decreto 11/2009, do 8 de xaneiro, e de conformidade coas competencias que me atribúe o artigo 34 da Lei 1/1983 do 22 de febreiro, reguladora da Xunta e da súa Presidencia,

RESOLVO:

Primeiro. Obxecto e finalidade da axuda concedida

1. Esta resolución ten por obxecto a concesión directa dunhas axudas sociais de carácter extraordinario destinadas a complementar o bono social térmico correspondente ao exercicio 2021, que se aboará ás persoas consumidoras que sexan beneficiarias do bono social de electricidade previsto no artigo 45 da Lei 24/2013, do 26 de decembro, do sector eléctrico, o 31 de decembro do ano 2020.
2. A axuda ten como finalidade complementar a axuda concedida para compensar os gastos necesarios para garantir o subministro de enerxía para usos térmicos ou o apoio a actuacións de aforro ou melloras da eficiencia enerxética aos consumidores vulnerables.

Segundo. Compatibilidade con outras modalidades de axudas

Esta axuda é compatible coa percepción doutras subvencións, axudas, ingresos ou recursos para a mesma finalidade procedentes de calquera Administración ou entes públicos ou privados, nacionais ou internacionais, das que puidesen beneficiarse as persoas destinatarias da axuda. Así mesmo, será compatible coa percepción do bono social de electricidade.

Terceiro. Crédito orzamentario





Estas axudas faranse efectivas con cargo á aplicación orzamentaria 13.03.312A.480.6, polo importe de 6.639.600 euros.

Cuarto. Contía da axuda

A contía da axuda fíxase en 100 euros, que se aboará mediante un pago único a cada persoa beneficiaria.

Quinto. Persoas beneficiarias e publicación

1. Serán persoas beneficiarias da axuda social de carácter extraordinario aquelas que sexan beneficiarias do bono social térmico correspondente ao ano 2021, que a súa vez son as beneficiarias do bono de electricidade previsto no artigo 45 da Lei 24/2013, do 26 de decembro, o 31 de decembro do ano anterior.

Serán persoas beneficiarias desta axuda complementaria as sesenta e seis mil trescentas noventa e seis persoas beneficiarias do bono social térmico de 2021.

2. A relación de persoas beneficiarias publicarase no seguinte enderezo <https://politicassocial.xunta.gal/gl/areas/inclusion-social/axudas-e-prestacions/bono-social-termico>. A publicación realizarase de conformidade coas garantías establecidas na Lei orgánica 3/2018, do 5 de decembro, de protección de datos persoais e garantía dos dereitos dixitais.

Sexto. Comunicación complementaria da concesión e renuncia

De xeito complementario á publicación da relación de persoas beneficiarias prevista no apartado quinto, a concesión da axuda comunicarase ás persoas beneficiarias mediante correo postal individualizado, conxuntamente coa comunicación correspondente á concesión do bono social térmico.

As persoas beneficiarias que renuncien ao bono social térmico entenderase que o fan tamén á axuda extraordinaria, sen que sexa posible renunciar soamente a esta axuda complementaria.

Sétimo. Información

1. As persoas beneficiarias poderán consultar os datos a través do seguinte enlace: <https://bonosocialtermico.xunta.gal>, indicando o DNI e o código de referencia que se lle comunicará individualmente por correo postal. Se non se dispón dos medios necesarios, poden acudir aos puntos de acceso público, a internet ou aos servizos sociais do respectivo concello.





2. Para obter máis información sobre esta axuda, pode acceder ao enderezo <https://politicassocial.xunta.gal/gl/areas/inclusion-social/axudas-e-prestacions/bono-social-termico>, ou chamar aos teléfonos 881 996 572, 881 996 573 e 881 996 574.

Oitavo. Control e verificación

Todas as axudas concedidas ao abeiro desta resolución estarán sometidas á función interventora e de control financeiro exercida pola Intervención Xeral da Comunidade Autónoma, nos termos que establece o título III da Lei 9/2007, do 13 de xuño, e a súa normativa de desenvolvemento e ás actuacións de comprobación previstas na lexislación do Tribunal de Contas e do Consello de Contas polo que as familias beneficiarias quedan obrigadas a facilitar toda a información que lle sexa requirida por estes no exercicio das súas funcións de fiscalización e control do destino das axudas.

Noveno. Reintegro das axudas

Conforme ao establecido no artigo 40.1.g) do Decreto 11/2009, do 8 de xaneiro, procederá o reintegro, total ou parcial, da axuda pública percibida no suposto de incumprimento das condicións establecidas para a súa concesión.

Décimo. Transparencia e bo goberno

En virtude da situación de vulnerabilidade das persoas destinatarias destas axudas, de conformidade co artigo 17 da Lei 1/2016, do 18 de xaneiro, de transparencia e bo goberno, e co artigo 15.2 da Lei 9/2007, do 13 de xuño, a Consellería de Política Social non publicará no diario oficial a relación das persoas beneficiarias nin o importe das axudas concedidas.

Undécimo. Impugnación

Contra esta resolución, que pon fin á vía administrativa, poderase interpor recurso potestativo de resolución ante a Consellería de Política Social, no prazo dun mes contado desde o día seguinte ao da súa notificación, ou ben directamente recurso contencioso-administrativo ante o Xulgado do contencioso-administrativo de Santiago de Compostela, no prazo de dous meses, nos termos previstos na Lei 29/1998, do 13 de xullo, reguladora da xurisdición contencioso-administrativa.

Santiago de Compostela,

A conselleira de Política Social
Fabiola García Martínez

